

Wesp

Ee geel-zjwat giftig bölke
Lupt noa zie hólke
Langs os blommegeëdjje
Neëve 't leempeëdjje
't waggeld of 't get sjterks
Gedronke houw
En lupt mit zie gezich
Gans weggedoake
Ich vroag mich aaf woavuur?
Doe has mich toch nit gesjtoake.
Jan Halmans

Vreuger

Ich leep te voot noa de tram
Op de voes ing botterham
In 't velt der kaffe noabringe
Onger 't lof 't Tantum Ergo zinge
Sjtong demilk nog i gen teute
Woare de jonge op de maedjes n't fleute
Houw de kat in der reëge gesjtange
En vier houwe inne mei-keëver gevange
Honge de erte in gen leut
Hoeëg beum vol freut
De mam makde os kufkes
Vier houwe twieë lach-duufkes
Weijebłomkes plukke op de bleek
't Woar allenuj ech en oane "zeek"!
Jan Halmans

Pieëpel

Ummer dól en roeteleboet!
Vloog d'r pieëpel
Noe heëj en dan doa,
Heë fladdert alle blumkes noa
Va blom bis blom
En alles um de buët
Wie zich dat gehuët
Ee muulke hei, en get nektar doa
Uveral drop en draaf
Zoeë fladdert d'r pieëpel ozze gaad oet!
Jan Halmans

Pluk d'r Daag

In het leëve ontgeet dich van dinger waal ins de zin,
Is 't allemoal alleen nog mèt te doeën om finansjeel gewin?
Gebuërt d'r nieks mieër geweun vuur 't plezeër,
Onger 't motto: ich doeën dat gewuën geer.

Loate vieër os alleen noch mér leije doeër de waan* van d'r daag,
woebie d'r ene daag alles en de volgende daag gaar nieks maag?
't is in ozze tied gewuën neet te geleuve,
Dat vieër zoeë diks 't leëve neet mieër preuve.

Geneet van de klene dinger en pluk d'r daag,

Of 't noë guster woar, murge wurd of 't is vandaag.
't is dich mèr ins gegeëve, dus geneet d'r van,
Omdat 't vuur dats-te 't wits vuurbie zin kan!

Ron Logister

Kleen dinger

De kleen dinger in 't leëve,
Kinne dich zoeë veuël vruud geëve!
'sjMurges vreug op het graas de dauw,
Of de loch sjtroalend en blauw!
'n Vuëgelke dat aan het fleute is,
En flot mak dat het wegkump es-te d'r bis!
D'r eekheuëre deë zich 'n noeët kump hoale,
De sjerre die aan d'r hieëmel sjtroale!
De zon die aan d'r hieëmel sjteet,
't is aaf en toe net of 't neet besjteet!
Went v'r dinke duks neet aan die klene zake,
Doa zulle v'r van aaf motte rake
Went juus al die klene dinger,
Motte v'r doer geëve aan os ege kinjer!
Die kleen dinger geëve de nuëdige kluër aan 't leëve,
En es dat vergeet, zulle v'r os dat noeëts vergeëve!

Ron Logister

Moeëderdaag

Binnenkort is 't weer "Moederdag",
gont allemaol nao Mam mit gulle lach!
Un blumke deet 't ummer good,
Mér 't geet dich toch boave d'r hood,
Es te zuus dat duk alleen op deë ene daag
Vuur de mam wurkelijk alles maag!
Doarom is 't beëter de mam dukker get te geëve
Dat gieëf heuër nog mieë voldoening in 't leëve!
Inne danke vuur alle goeie zurge,
Neet alleen huuj mér ooch weer murge!

Ron Logister

Poasiweer

Mit Poasje woar 't zoeëmerweer,
dat mak'ste neet duks mit,
dan woar 't kaod bis óp 't lets,
d'r sjnei wer boete likt.

De beum sjtoan volóp in blui,
es 't noe mar neet geet vreeze,
want angesj zalle v'r dit joar,
nog gans get freut verleze.

Dieke boeëne, en de radieze,
die kinne d'r waal teëge,
mar d'r blómmezoad in al mieng pöt,
zit neet óm vrós verleëge.

De moand April deet wat heë wil,
dat is al lang bekind,

't kin reëge, vrós of hagel zien
of kouwe sjrale wind.

Mar inins is 't sjlechte weer vuurbei,
dat is woeë vier óp hope,
en kin'ste wer de ganse daag,
mit kótte muikes lope.

Dan sjtoan de beum pas ech in blui,
en alles kumt tot leëve,
dan zit ich lever in d'r gaad,
es heem zitte te sjrieve.

Thei Janssen †

D'r Poasjhaas

Ich bin d'r Poasjhaas.

Noe dinkt ier; dat is aardig, d'r poasjhaas, nog noeëts gezieë en inins sjteet heë doa.

Mar noe mot gier neet dinke dat ich hei vuur mieng plezeer sjtoan.

Als poasjhaas sjtee'ste gans alling.

Dreihongerdtwieëenzestig daag per joar zit ich in de weewee, mar dan inins loop ich mich drei daag de puët
onger mieng lief oet mit inne kórf vol eier en die mot ich da óch nog versjtoppe.

Wit dier waal dat d'r viefmieljoeën hoeshouwesj i Holland zint.

En bei jieëker hoeshouwe mot ich ing eike versjtoppe, en soms óch waal tieën

Viefmieljoeën hoeshouwesj, neet te geleuve, 't lieke waal knieng.

Vreuger houw'ste die ouwerwetse hoezer, mit hei en doa ing duuster eksjke of ing luuksjke, dus ummer waal ing
meugeligheid om 'n eike voet te legke.

Mar noe, in die nuie moderne betonblök kin'ste dieng ei nurges mieë kwiet

Aaf en tow loop ich inne haove daag om zoeëne bunker hin vuur dat ich ing plekske höb gevonge woëvan ich
dink dat ze nit dierek hun geniek d'r uëver zulle breëke.

Mar ich bin nog nit good en waal um d'r ek of ich huur al inge zage; verrek...hei ligt ing ei

En dan is 't nog nit ins Poasje.

Vreuger woar dat mekkeliger, toen houwe de mieëste hoezer nog ing geëdje en doa woar ummer waal inne
sjtroek of ing beumke woeë'ste get eikes achter kwiet kós rake.

Dan sjprong'ste uëver de hek van 't inne geëdje noa 't angere, mit 't risiko dat'ste op ing meshupke terechkoams.
Hütsedaags mot ich al in d'r fibberwaar beginne, en alles alling.

Doe briks diene nak uëver Sinterkloaze en Krismennekkes, mar poasjhaze...mar inge, en dat bin ich

Dan sjtoan ich in d'r fibberwaar al in zoeë inge betonne toere, zoeë ing vleesjpakhoes, mien eikes te versjtoppe.

En neet achter de centrale verwerming, want dan zint ze teëge de Poasje al voel

Ich zoog ins touwvellig in inne gaad wie ing jungske ing eike van mich vong.

Wat ing sjiet ei ,sjreit deë poet en wörpt 't uëver de hek bei mich op d'r kop.

Ich hou dat menneke 't leefst ing om de oere gegeëve, mar dat kin'ste es poasjhaas nit make.

Wen ich ins ing geëdje vergeëte bin höb ich al dierek zeek mit de vakbond , doa woeënde touwvellig ing lid van
de FNV.

Esof ich dat ruuke kos.

Ze vergeëte ongertusje waal dat ich in kotte tied mieë werk verzit es 10 angere miensje in ing gans joar.

Mar vuur mich is d'r noeëts get ekstras.

Ing ekstra oetbetaling? Noeëts...!

Gee miensj deë doa aa dinkt.

En dan de kwaliteit van de eier, doa zint ze óch ummer uëver aan 't ensjele.

Ze zint te kling, of ze houwe lever broene , of ze zint neet besjilderd.

Ne...allich neet.

Vreuger besjilderde ich de eier, doa woar ich 'n gans joar mit bezig.

Ich houw óch inne ganse ploog kunssjilders i deens, die sjilderde komplette landsjappe op 'n ei, mar die zint neet
mieë te betale, die hove nog mar éé sjilderij per joar te make om ing subsidie te kriege woeë ze 't ganse joar van
kinne leëve.

Doa bin ich dus óch mit gesjtop, deë zieng eiere nog geverf wilt hóbbe mot dat mar zelf doeë.
Poasje is 't fieeës van de vruid. mar vuur mich is 't alling mar ieëlend.

Want ich ren mar durch de velder en de weie om de miensje 'n bietje vruid te geëve, want ing haof ei is ummer nog beëter es ing leëg döpke, en vuur da'ste 't in de gate hōbs zit'ste midde in ing driefjach en hōb'ste inge sjuët hagel in dieng vót.

De poasjhaas is voeëgelvrie gewoare.

D'r weëd allenui bedankt en ich wunsj uch inne zieëlige Poasje.

Thei Janssen †

Helle eier

Mit Poasje eët ich helle eier,
dat is lekker, doa geneet ich van,
behalve ing paar daag spieëder,
es ich neet noa 't hūske kan.

Thei Janssen †

't Moag wer vreugjoar weëde.

De letste poor en boerekoeël,
hōb ich oet d'r gaad gehaald,
en vuur tweeë karre mes,
hōb ich vōal geld betaald.

't Is noe te hoape dat 't weer,
't neet aaf lieët wete.

Want angesj kan ich de "sjupperie",
vuurleupig waal vergeëte.

Ing oer vuurdat 't duuster weëd,
goan ich doa aa beginne.

't Is dan óch neet al te sjwoar,
en ich bin op tied wer binne

noa jieëker veurke wat ich hōb gesjupt
mót ich eëve op de sjup goan hange
en mót ich mit d'r tesjedook
d'r voele zijweet ieësj óp goan vange

mar endlich...noa in weëk of tweeë,
dan moagt geer kómme kieke,
want dan begint mieng geëdje,
pas ech op get te lieke.

Nog eëve...dan vingt 't zieëne aa,
dus loat mich mar geweëde
d'r winkter doerde lang genóg
't moag noe vreugjoar weëde

Thei Janssen †

De kluëre van de poasjhaas

In de tied dat Broenssem nog mer 'n durpke woar. De tied dat der nog geen oud gemeentehoes woar. De tied dat Rompe nog los loog van Broenssem en der nog geen bruk woar en gene Langeberg om der achter te ligke. In die tied sjpilt zich dit verhoal aaf.

Doe woar der nog veuël mieë buusj en hei wie huu ze daags. En urge deep in deë buusj, woar 'n plaatsj hoe de deëre angesj woare wie hiej. Doa versjtinge zich kat en hondj, vos en hoon of wolf en sjoap. Ze wonde allemoal in vrij bie ee. Doa woërdt zich ongereë geholpe en zich neet op de heure gehauwe! Soms woar der waal 'ns

get vregel. Mer dat koam meestal doeërdat de jong deëre mit versjtupperke sjpieële doeër der koeëlhof van Harie der haan heër rende. Deë haan woar ´n bietje inne opgeregde. ´t Sjmurges, krek went de zon op koam, woar deë toepes al oet de veëre. Dan begos heë te sjreije, dat alle angere deëre oet hun bid vele! Hoebeërt hondj hou al ´ns vuur Harie gesjtange en heuëm beloaf ´m in de prijte te biete went heë nog ins zonne beheij makde. Dan koam der ouwe Sjeuf sjoap der tusje, deë kalde ´ns mit allebeij en dan woar ´t weer good. Zoeë ging dat doa, Sjeuf sjtrek alle ploëje glad.

´t Woar ´n wonjerlik durpke. Zooë biezonjer dat gene ´t vreëm vong dat, ´n bietje achteraaft, in ´n kleen hote huuske der poasjhaas wonde. Dat woar inne groeëte sjtaatse haas mit groeëte lang oeëre die wie tweeë leëpele boave zien gries kruun oet sjtoke. Joa heë woar al get gries aan ´t weëre, went ´t woar der jongste neet mieë. Der poasjhaas koam noeëts i ge durp. Nee, doa hou heë ´t te druk vuur. ´t Ganse joar brachte alle hoonder oet gen durp heuëm de eier en dan woar heë aan ´t sjildere. De sjoëenste kluëre, blauw, roeëd, geël, greun, oranje, broen en paars. Van alle kluëre hou heë groeëte put in zien kluëresjop sjtoa. Zoe ging dat, daag in daag oet. De hoonder brachte heuëm de eier en heë sjilderde ze in alle bontje kluëre. En ´n paar jong heëskes, neëfkes van der poasjhaas heë hau der genug, holpe heuëm mit de eier op de druëgrikke ligke en noaheër nao ´t eierlager bringe. Bis aa Paumzondig ging dat zoeë doeër. Dan reep de poasjhaas zien ganse famielje bie ee. Dan woeërte de routes verdeeld en kreeg jieëderree ´n groeëte mangel mit eier op gen ruk om die in de Poasjnach bie de luuj te bringe. Went jieëderree zien taak vuur de verdeling van de eier hau, dan pakde de poasjhaas zich ´n paar weëke vriej en ging noa zien zuster die oppe Broenssemmerhei wonde. En went heë zich dan get geres hau, begos heë ´n weëk noa Beloake Poasje weer te sjildere.

Bis op ´n duustere en versjrikkelikke nach, ... der woar inne richzige sjtorm op komme zitte. Inne windj deë brulde doeër der buusj en de beum beugde zich zoeë deep dat ze der van kraakde. De vinstersjleëg van ´t huuske van der poasjhaas kraakde en piepde dat heë bang woar dat ze van de moeër aafgebloaze zouwe weëre. ´t Blitsde en hoemelde dat hun huëre en zieë verging. De deëre krope engstig bie ee. Bis opins inne felle flits ´t ganse durpke in vol leech zat en glik drop inne helle sjlaag deë de grondj leet sjokkele. De jong deëre sjreide en beuëkde van angs en Bertje, ´n nog erg jonk bekske, hou ´t van angs in de boks gedoa. Karool, ´n erg egewies sjroete kuke, keek oet gen vinstere en begos te sjrieëwe. "Poasjhaas, poasjhaas, ´t kluëresjop sjteet in brandj!" Wie ´t weer get vuurbij woar en de deëre de sja ginge opnumme, hubbe ze zich versjrokke. Van ´t kluëresjop van der poasjhaas woar nieks mieë uëver. Al woar verbrent en der poasjhaas sjting mit troane in zien oge der neëve. "Ocherm, ocherm wie mot dat noe?" zag heë. "´t Woare zon sjoëen kluëre. Wie krieg ich noe de eier vuur de volgende Poasje veërdig? Wat ´n leed, wat ´n leed." Jieëmerde der poasjhaas. Der woare nog gene Gamma en Praxis. Trouwens, de kluëre die de poasjhaas gebroekt krieste doa gaar neet.

De deëre koame in vergadering bie ee om te uëverlikke wat der noe gebuëre mot. Opins zeët Victor der vos: "Poasjhaas, gier zigt toch ummer dat ´t bie dien zuster oppe Broenssemmerhei zoeë sjoëen is, kinne vier doa geen kluëre kriege?" En omdat der vos de groeëtste moel en ´t meeste koeraasj hau en ´t toch waal ´n gevieërlikke rees woar, makde heë zich op weëg noa de Broenssemmerhei. Wie heë oppe hei woar aagekomme keek heë zich de oge oet van al die sjoëene kluëre. Mer wat heë zich och bedach, heë wos neet wie heë ze kos mitnumme. Heë woeërd der hoas garetig van. Heë leep mer rondj en prakkezeerde zich onnuëzel. Bis dat heë zich van meugigheid onger ´n dieke eek get ging reste en in inne depe sjoap veel. Heë dreumde dat heë uëver de Broenssemmerhei leep. De zon die sjeen zoeë sjoëen en heur good geële sjtroale zatte de ganse hei in de biezonjerste kluëre. Victor kos ´n zonnestsjtroal vaspakke en in zien ruktesj doeën en hau zoeë ´t sjoëenste geël wat heë zich kos wunsje. Zoeë plok heë ´t frisje greun van varens en ´t paars van de hei. Heë leep wiejer en zoog wie de zon ´t water van der Koffiepool ´n aparte kluër broen goof. En ´t water van der Roeë Beëk woar inins deep roeëd. Oranje vong heë bie get paddesjteul die in deë tied van ´t joar nog es ´n wonjer in volle prach sjtonge. Doe keek heë noa de loch die hieëmsblauw woar en hoe geen wulkske aan te zieën woar. Heë rende de Heikop op, sjprong zoeë hoeëg wie heë kos en sjnapte zich ´n sjtukske van ´t hieëmsblauw.

Mit volle tesj ging heë op heem aa. Wie der poasjhaas de kluëre zoog kreeg heë troane van bliedsjap in zien oge. Victor vos woeërdt in ´t ganse durp geieërd. En Lex der Lieëw, deë kuëning woar, goof Victor ´n ieëresj pang en beneumde heuëm tot ridder. Vanaaf die tied wurdt Broenssem der Parel geneumd. Of de ridder Vossjtroat doa och get mit te make heët weet ich evvel neet.

Wiel Roeselers

De zoeëmer kumt!

Ich wil naoë boete

Ich wil der oet

Ich wil mich neet opsijlete

Ich blief neet in de boet

Boete daoë sjient de zon
Ze sjittert in de viever wie in glaas
Ich veul de zoeëmer komme
Ich ruuk al 't graas

Nog effe en 't is zoeë wiet
De eërd wurdt weer opgewermd
Ich kan der bau neet mieë op wachte
Dat de zon mich omermt!

Wiel Roeselers

Vreugjoar

Went de magnolia's
oetbundig sjtond te bluije.
En in azalea en rododendron
de knoop beginne te gruije.
Aan beuke, wie veënkes,
de nuje bleëdjies komme.
De hosta's hun bleër ontrolle
en varens zich ontkromme:
De zon de eërd raakt,
vuurzichtig mit werme handj.
Dan zou ich 't oet kinne sjrieëwe:
"t Vreugjoar is in 't landj!"

Wiel Roeselers

Vuurjoar

De knoop van de beum,
die sjtoan op sjpringe.
Doe huërs de vuëgel,
dat ze kloarder zinge.
De zon heur sjtroale,
beginne dich te winke.
In frisj greun,
zuus-te narcisse kup blinke.
't Water van de viever,
wurdt langzaam kloar.
Doe veuls 't komme,
't vuurjoar!

Wiel Roeselers